

Headline	Harap sekolah menengah kedua segera dibina		
MediaTitle	Sinar Harian		
Date	12 Oct 2017	Color	Full Color
Section	Selangor & KL	Circulation	160,000
Page No	40	Readership	509,000
Language	Malay	ArticleSize	175 cm <sup>2</sup>
Journalist	N/A	AdValue	RM 2,985
Frequency	Daily	PR Value	RM 8,955



## Harap sekolah menengah kedua segera dibina



WAN ISMAIL



KHAIRUL ANNUAR

**SAUJANA UTAMA** – Majlis Permuafakatan Penduduk (MPP) Saujana Utama menantikan berita gembira berhubung isu sekolah menengah kedua sempena kunjungan perdana menteri di Pasar Tani Saujana Utama, Sabtu ini.

Pengerusinya, Khairul Annuar Jalaluddin berkata, kedatangan Datuk Seri Najib Tun Razak diharapkan dapat menyejajarkan projek pembinaan sekolah menengah kedua yang kini dalam proses tender.

“Sudah jadi harapan penduduk supaya kedatangan pemimpin nombor satu negara itu dapat memberikan khabar menggembirakan sekali gus menyelesaikan masalah sekolah di Saujana Utama.

“Penduduk sudah menanti terlalu lama untuk sekolah menengah kedua memandangkan sekolah sedia ada tak cukup dan terpaksa menambah kelas untuk menampung pelajar tingkatan satu.

“Jika projek sekolah kedua dapat disegerakan, insya-ALLAH membantu mengurangkan jumlah murid dalam satu kelas

dan menghasilkan suasana pembelajaran yang lebih selesa,” katanya.

Timbalan pengerusinya, Wan Ismail Hashim berkata, kepadatan penduduk yang semakin tahun meningkat sudah tentunya memberi kesan kepada jumlah pelajar di sekolah sedia ada.

“Kami difahamkan tapak dan peruntukan sudah ada dan berharap supaya kerja pembinaan sekolah ini dapat disegerakan bagi penyelesaian anak penduduk pada masa akan datang,” katanya.

Sementara itu, Ahli Parlimen Kuala Selangor, Datuk Seri Dr Irmohizam Ibrahim menjelaskan, pihaknya mengadakan pertemuan dengan menteri pendidikan berhubung isu sama baru-baru ini.

“Saya difahamkan proses tender sudah pun selesai dan sekarang ini kementerian sedang memilih kontraktor bagi projek pembinaan sekolah terbabit.

“Saya yakin gerak kerja bina sekolah ini dapat disegerakan menjelang akhir tahun ini. Saya akan meneliti permasalahan isu sekolah ini dengan lebih dekat,” katanya.